

Uunga siunnersuut: Sukisaarsaatigalugu aalisartunik aalisartitsinermut akuersissuteqartarneq pillugu Inatsisartut inatsisaat

Akissuteqaat

(Aalisarnermut, Piniarnermut Nunalerinermullu Naalakkersuisoq)

Aappassaaneerinnineq.

Matumuuna Naalakkersuisut sinnerlugit Inatsisartut Aalisarnermut, Piniarnermut Nunalerinermullu Ataatsimiititaliaq sukumiisumik sulinera pillugu qutsavigaara aammalu ataatsimiititaliap siunnersuutip saqqummiunneqartup akuerineqarnissaanik inassuteqaateqarnera pillugu Naalakkersuisut qutsavigaat.

Ataatsimiititaliap isumaliutissiissutimini paragraffinut ataasiakkaanut oqaaseqaataani qupperneq 3-mi ataatsimiititaliami ikinnerussuteqartut inatsisissatut siunnersuummi §§ 1 aamma 2-mut tunngatillugu isumaqarput qallunaat innuttaasullu nunani allamiut immikkut pineqarnerisigut paragraffini aalajangersakkat ammip qalipaataa tunngavigalugu immikkoortitsinermut attuumassuteqangajassinnaasut.

Inatsisissatut siunnersuummi naalagaaffeqatigiiffiup iluanni innuttaasut assigiimmik pineqarnerat ammip qalipaataa tunngavigalugu immikkoortitsinermut attuumassuteqartutut isiginngilara.

Inatsisissatut siunnersuummi §§ 1 aamma 2-mut tunngatillugu aallaavigineqarpoq Aalisarnermut Inatsimmi § 8-mi piumasaaqatit, tassani pineqarami nunami imaanilu aalisarnikkut Kalaallit Nunaata oqartussaaffigisaanni inuussutissarsiutiginagu aalisarneq. § 8 imm. 1-imi taaneqartoq imatut oqaasertaqarpoq:

” Inuit danskisut innuttaassusillit Kalaallit Nunaanni aalajangersimasumik angerlarsimaffillit imartani Kalaallit Nunaata aalisarnikkut oqartussaaffigisaanni inuussutissarsiutiginagu aalisarsinnaapput. Nunani allani Danmarkiunngitsumi innuttaassusillit Kalaallit Nunaanni najugaqavissut ukiullu kingulliit marluk ataavartumik Kalaallit Nunaanniissimasut danskisut innuttaassuseqartutut pineqassapput.”

Aalisarnermut Inatsimmi § 8-misut inuit danskisut innuttaassusillit ammalu danskisut innuttaassuseqanngitsut immikkoortinneqartarnerat nutaajunngilaq. Inuit naalagaaffeqatigiiffimmi Kalaallit Nunaanni, Danmarkimi Savalimmiunilu innuttaassuseqanngitsut ukiuni arlaqalersuni atuuttumik aalisarnermut allagartaqaratik aalisarsinnaassagunik Kalaallit Nunaanni minnerpaamik ukiuni marlunni najugaqarsimasussaataapput.

UKA2011/102

APNN suliaq nr. 2011-055726

Isumaqarpunga sukisaarsaatigalugu aalisartunik aalisartitsinissamut akuersissuteqartarneq pillugu inatsisissaq Aalisarnermut Inatsimmi § 8 naapertorlugu ilusilersorneqartariaqartoq,

aalajangersakkamimi tassani ersersinneqarmata sukisaarsaatigalugu aalisartunik aalisartitsinissami kikkut aalisarsinnaanissamut akuersissummik pissarsisinnaanersut kikkullu pissarsisinnaanngitsut.

Kuunni akuersissuteqarfiusimasuni sukisaarsaatigalugu aalisartitsinissani Aalisarnermut Inatsimmi § 8 naapertorlugu akuersissuteqarnissani pineqartut tassaapput inuit taakkorpiaat.

Kalaallit Nunaanni ukiuni marlunni najugaqareersimanissamik piumasaqaat alla assersuutaasinnaasoq tassaavoq Piniarneq Aallaaniarnerlu pillugit Inatsisartut Inatsisaat nr. 12, 29. oktober 1999-imeersumi § 4, imm. 2, nr. 2. Tassani inuussutissarsiutigalugu piniarnissamut allagartamik pissarsisinnaanissami piumasaqaataavoq qinnuteqartoq Kalaallit Nunaanni ukiuni marlunni kingullerni inuit allattorsimaffianni najugaqartutut nalunaarsimassasoq.

Tamanna tunngavigalugu §§ 1 aamma 2-mi aalajangersakkat ammip qalipaataa tunngavigalugu immikkoortitsinertut isumaqarfiginngilakka.

Taamatut oqaaseqarlunga siunnersuut Inatsisartunit aappassaaneerlugu oqallisigisassanngortippara.